



Inatsisartunut ilaasortaq Palle Christiansen, Demokraatit  
/maani

**Kommuninut ataatsimoortumik tapiissutit agguanneqarnissaat pillugu § 37  
naapertorlugu apeqqummut nr. 169-imut akissuteqaat**

19. september 2013  
Sags nr. 2013-088372  
Allakkap normua 1333763

Kommuninut ataatsimoortumik tapiissutit pillugit Naalakkersuisunut apeqquteqaateqarputit, Naalakkersuisut sinnerlugit akissuteqarfigisassannik.

P. O. Box 1037  
3900 Nuuk  
Oqarasuaat (+299) 34 50 00  
Nassitsigasuaat (+299) 34 63  
50  
E-mail: oed@nanoq.gl  
www.nanoq.gl

Apeqquteqaatit siulleq kingulliutillugu akissuteqaateqarfigisavara, isumaqaramami akissuteqaateqarnissanni tamanna pissusissamisoernerussasoq.

**Apeqqut 2:**

Qanoq ilillutik Naalakkersuisut inerniliuppaat, Kommuneqarfik Sermersuumut tapiissutit 20 millioner koruuneqqissaanik ilanngarneqassasut tunniullugillu Qaasuitsup Kommunianut (12 millionit) aamma Kommune Kujallermut (8 millionit)? Akissummi Naalakkersuisunut ilannguteqquneqarput kommuninut ataasiakkaanut kisitsisit pingaarnerit tamannalu aqqutigalugu tunngavilersorlugu, qanoq iliorluni kisitsisit pineqartut pissarsiarineqarsimanersut.

**Akissut:**

Tulliuttuni kisitsit pingaarnerit atorlugit kommunillu pillugit paasissutissat assigiinngitsut saqqummiutissavakka.

Kinguliani takussutissiami atuarneqarsinnaavoq 2009-2011-mut innuttaasut ataasiakkaarlugit kommunit isertitarisaat qanoq amerlatiginersut naatsorsorneqarsimanerat. Takussutissiami atuarneqarsinnaavoq, 2011-mi innuttaasumut ataatsimut isertitat kommuninut pingasunut allanut sanilliullugit Sermersuumi 10 %-it missaannik qaffasinnerusut.

Taamaalilluni matumani imaappoq, kommunit pingasut allat innuttaasumut ataatsimut 10 kr.-inik atuisarpata, taava innuttaasumut ataatsimut 11 kr.-it atorneqartarnissaat Sermersuup periarfissaraa. Isumaqarpunga tamanna kommunit akornanni aningaasaqarnikkut assigiinnginnerujussuup ersiutigigaa.

**2009-2011-mut kommunini innuttaasumut ataatsimut isertitat**


| Aningaasat kr.-inngorlugit | Kommune/ Kujalleq | Kommuneqarfik Sermersooq | Qeqqata Kommunianut | Qaasuitsup kommunianut |
|----------------------------|-------------------|--------------------------|---------------------|------------------------|
| 2009                       | 51.406            | 63.363                   | 53.217              | 53.677                 |
| 2010                       | 53.724            | 63.590                   | 55.713              | 55.486                 |
| 2011                       | 60.184            | 66.345                   | 60.553              | 61.507                 |

Tunngavigineqartoq: Kommunit naatsorsuutaat, [www.kanukoka.gl](http://www.kanukoka.gl)

Tamatumunnga ilanngunneqassaaq, kommunini akileraartarnermut annertussutsit atuutut ilanngunneqarpata aningaasaqarnikkut assigiinngissutit annertunerulernissaat. Kujalleq aamma Qaasuitsuq kommunimut akileraarutaat 28 %-iupput, Qeqqani 26 %-iullutik Sermersuumilu 25 %-iullutik.

Kinguliani takussutissiami piffissami 2003-2013-imut kommunini innuttaasut amerlassusaasa ineriartornerat takussuserneqarput. Titartakkami atuarneqarsinnaavoq, Kujallermi innuttaasut amerlassusaat 10 %-erluinnarnik Qaasuitsumilu 7 %-it missaannik ikileriarsimasut. Paarlattuanik Sermersooq 10 %-erluinnarnik amerleriarfiuvoq. Qeqqani innuttaasut amerlassusaat piffissami allannguuteqarsimanngillat.

**Indeks 2003=100** Kommunini innuttaasut amerlassusiat



Taamaalluni ataatsimut isigalugu Qaasuitsumiit Kujallermiillu amerlasuunik nutsertoqarsimavoq paarlattuanillu Sermersuumi ukiuni qulini kingullerni nuuttartut amerleriarsimallutik.

Siuliani pissutsit tunngavigalugit isumaqarpunga, maannakkut iliuuseqanngikkutta, taava ukiuni tulluuttuni kommunini pigissaarnerup akileraarutillu qaffasissusiisa assigiinngissusii annertusiartuinnassasut. Tamannalu sakkortusiartuinnartussaavoq.

Apeqquteqaatinni tunngavilersuutitut nalunaarutigaa, Sermersooq kommuninut allanut agguassassanik aningaasanik amerlasuunik akiliuteqartareersoq. Tamatumunnga tunngatillugu erseqqissaatigissallugu pingaaruteqarpoq, Sermersooq ilaatigut Nuummi Namminersorlutik Oqartussat qullersaqarfeqarnerisigut DIN-illu inissisimanageratigut immikkorluinnaq inissisimasoq. Taamaattumik naalagaaffiup ataatsimoortumik Kalaallit Nunaannut tapiissutai amerlanerusut tunisassiornermut pisortallu kiffartuussinerinut Nuummi atorneqartarput. Taamaattumik Sermersooq taamaaliornikkut kommunini akileraarutinut isaasunut pitsaasumik isertitaqartarpoq naalagaaffimmiit ataatsimoortumik tapiissutinut tunngasunik. Taamaattumik isumaqarpunga naammaginartuusoq, Sermersuumi ataatsimoortumik tapiissutit pilersitaasa ilaat nunap sinnerani innuttaasunut iluaqutaasariaqarnerat.

Ataatsimut isigalugu isumaqanngilanga Sermersuup kommuninut allanut tapiissutigisartaagaasa amerlassusiat pingaaruteqarpallaanngitsut. Pingaarnersooq tassaavoq, kommunit akornanni erseqqissumik assigiinngissutit misissorneqarnissaat, nunattalu ineriartortinneqarnerani oqimaaqatigiissaarinermik pitsaanerumik pilersitsisoqarluni.

Aningaasanut amerlassutsinut agguanneqartussatut siunnersuutigineqartunut tunngatillugu ilisimatitsissutigisinnaavara, aningaasat 8 mio. kr.-it Kujallermut toqqarneqarmata, Kujallermimi iluanaarutinut akileraartarnermi 1 procentinut naapertuummata. Qaasuitsumut 12 mio. kr.-it nalingat akileraarutit procentiannut 3/4-inut naapertuupput. Kujallermi innuttaasut amerlassusiisa ineriartorneri nassuiaaserneqartut tunngavigalugit ilaatigut naliliivunga, Kujallermi aningaasanik immikkut pisariaqartitsineq Qaasuitsumit annertunerusoq.

Sermersuumut 20 mio. kr.-it nalingat akileraarutit procentiannut 1/2-inut naapertuupput.

Sermersuumi kommunimut akileraarut 25 %-iusooq Kujallermi Qaasuitsumilu 28 %-iusooq eqqarsaatigalugit kommunillu ataasiakkaat akornanni assigiinngissutit nassuiaaserneqartut eqqarsaatigalugit, Naalakkersuisut maanna siunnersuutaattut agguaaqqinnisaaq annikitsunnguuvooq.

Erseqqissaatigissavara, ukiuni tulliuuttuni kommunit akornanni agguaaqqittarnermi annertunerumik pilersitsinissaq Naalakkersuisut anguniagarimmassuk. Naalakkersuisut piffissami aggersumi kommunini akileraartarnermik nalimmassaaneq aamma ataatsimoortumik tapiissutit agguaattarnerat 2015-imi atuutilersussaaq pillugu kommuninik oqaloqateqarneq aallartissavaat.

### **Apeqqu 3**

Tapiissutit nutaamik agguanneqarnissaannut Naalakkersuisut aalajangermata, kommunit amerlanerusunik aningaasanik perusuttut tamarmik parti Siumumik siuttuuffigineqarnerat qanoq pingaaruteqartigisimava?

#### **Akissut:**

Soqanngilaq.

Paasivara, kommunit akornanni akileraartarnermut naligiissitsisarnerup ataatsimoortumillu tapiissutit agguataarneqartarnerisa allannguuteqartinneqarnerisigut, taamaalilluni Sermersooq amerlanerusunik akiliisalersillugu, tamanna nutaajunngitsooq.

Taamanikkut Naalakkersuisuttaaq kommunit akornanni isertitaasartut agguanneqartarnerisa allannguuteqartinneqarnissaannut aammattaaq pilersaaruteqaralarput. Imatuummi pimoorussisoqartigaaq, KANUKOKA-mut erseqqissaatigineqarmat, kommunit namminneerlutik akileraarusisarnermik pisinnaatitaanerisa tamakkiisumik atorunnaarsinneqarnissaa. Taamanikkut Naalakkersuisuusut annertuumik alloriarnertut isumaqarfigaat maanna Naalakkersuisut Inatsisartunut inassuteqatigisaattut annikinnerusumik agguaaqqittarnissamut sanilliullugu.

Taamanikkut Naalakkersuisuusut illit Aningaasaqarnermut Naalakkersuisuunerpit nalaaani aammattaaq kommunit akornanni isertitat agguataarneqartarnerisa allannguuteqarnissaat pillugu siunnersuuteqarput. Taamatut allannguineq aammattaaq kommu-

ninut pingasuusunut, taamanikkut Siumumit aqunneqartunut, Sermersuup ajoqutissaanik, taakkununga iluaqutaasimassagaluarpoq.

Kissaatiginarsimassagaluarpoq, taamanikkut Naalackersuisuusut kommunit akornanni isertitaasartut agguanneqartarnissaasa allannguuteqartinneqarnissaannut namminneq siunnersuuteqarsimassagaluartut, taamaalilluni ullumikkumut naleqqiullugu nunarput naligiinnerusimassagaluarpat. Uagut aamma tamanna akisussaaffigerusupparput.

### **Apeqquut 1**

Suna pissutaava 2009-mi kommuninut tapiissutit agguanneqartarnerat pillugu isumaqatigiissummik Naalackersuisut ataqqinnikkumanginnerannut?

### **Akissut:**

Soorlu apeqquummut 3-mut akissutinni allattunga, akileraartarnermut naligiissaarinerup ataatsimoortumillu tapiissutit agguanneqartarnerisa allannguuteqartinneqarnissaat kommunit akornanni naligiinnerulernissap pilersinneqarnissaa pillugu, taamaalilluni Sermersuup akiliutigisartagai amerlanerulersillugit, tamanna nutaajunngilaq.

Eqqarsaatersuutit saniatigut illit naalackersuisuunerpit nalaani kommunit akornanni agguasarneq pillugu apeqquut 2012-imut ataatsimoortumik tapiissutit isumaqatigiinniutigineqarneranni Naalackersuisut kommunillu akornanni aamma tamanna oqaluuserineqarpoq.

Tamatununga tunngatillugu KANUKOKA-p Aningaasaqarnermut Naalackersuisumut Maliina Abelsenimut allagaata ilaa tigulaariffigineqarpoq.

*"Asasara Maliina Abelsen,*

*Kommuninut ataatsimoortumik tapiissutit pillugit isumaqatigiinniarnerni Naalackersuisut sinnerlugit kommunit sisamat ataatsimoortillugit peqqatit, kommunit akornanni naligiissaarisarnerup atuuttup taamaaginnartittariaqarnissaa imaluunniit allanngortinneqarnissaa.*

*Kingorna kommunit tusarniaanerni akissuteqaataat katersorpakka. Tusarniaanerni akissuteqaatini erseqqilluinnarpoq, kommunit taakkua sisamat assigiinngitsunik soqutigisaqartut.*

*Kingorna suliap KANUKOKA-p siulersuisuini oqaluuserineqarnissaa isumagisimavara.*

*Siulersuisut isumaqarput Naalackersuisut pisussaasuusut kommunit pisumut assigiinnerusumik periarfissiisinnaasut, tamatumani aningaasaqarnermut imminut napatittumut periarfissiisoqarluni."*

KANUKOKA-miit allakkani atuarneqarsinnaasutut, siornatigut KANUKOKA-p siulersuisuisa erseqqissaatigigaat, Naalackersuisut namminneerlutik iliuuseqarnissaa aalajangiiffigissagaat, kommunit akornanni aningaasat agguataarneqarnerisa allannguuteqartinneqarnissaa Naalackersuisut kissaatigissappassuk, kommunimmi imminerminni isumaqatigiissutigisinnaanngimmassuk, tamannalu imminut assortuuttumik soqutigisaqarnerisa pissusissamisoortumik kinguneraa.

Naalakkersuisut kommunit 2014-imut ataatsimoortumik tapiissutissaannut atatillugu isumaqatigiinniarnermi KANUKOKA kommuninut tapiissutit agguaanerisa allanngorne-  
rat pillugu isumaqatiginiarsimagaluarpaat. Tamanna pillugu KANUKOKA-mi isu-  
maqatigiinnissaq anguneqarsinnaagunangilaq.

Tamanna tunngavigalugu Naalakkersuisut toqqarpaat aningaasat agguanneqarnerisa  
allannguuteqartinneqarnissaannut iliuuseqarniarlutik, kommunimmi akunnerminni isu-  
maqatigiissummik nutaamik isumaqatigiissinnaanissaat ilimanangimmat, kommunit  
Naalakkersuisunillu isumaqataaffigineqarsinnaasumik. Tamanna 12. august 2013-imi  
allakkakkut borgmesterinit pingasunit erseqqissumik nalunaarutigineqarpoq.

Tamanna attanneqarsinnaangilaq, kommunit akornanni aningaasanik agguassinissaq  
kommunip ataatsip akornusissappagu, kommunit akornanni aningaasaqarnikkut ineri-  
artornermi pitsaanerusumik naligiinnerusoqarnissaanut annertuumik pisariaqartitsiso-  
qarpat.

Inussiarnersumik Inuulluaqqusillunga

  
Vittus Qujaukitsoq